



REZUMU

RELATÓRIU ATIVIDADE



**Provedoria Direitos
Umanus no Justisa**

2025

PRELIMINÁRIU

Relatóriu Atividade Provedoria Direitus Humanus no Justisa (PDHJ) 2025 dokumenta no apresenta implementasaun programa, atividade no ezekusaun rekursu institusionál durante períodu 01 Janeiro to'o 31 Dezembru 2025.

Dokumentu ida-ne'e nu'udar forma prestasaun kontas no transparénsia institusionál, tuir Lei Nú. 7/2004, 26 Maiu, ne'ebé determina obrigasaun PDHJ atu apresenta relatóriu atividade no relatóriu finanseira ba Parlamentu Nasionál, tinan - tinan.

Nu'udar Instituisaun Nasionál independente ida, PDHJ iha mandatu atu proteje direitus umanus no promove governasaun di'ak liu-hosi simu no trata keixa sira relasiona ho injustisa no má-administrasaun, hala'o investigasaun, monitorizasaun no hato'o rekomendasaun ba entidade competente sira.

Rezultadu, dezafiu no aprendizajen sira-ne'e apresenta iha parte sira tuirmai hanesan referénsia ba esforsu hamutuk atu harii Timor-Leste ida ne'ebé justu, inkluzivu no respeita dignidade umana.

PDHJ hato'o apresiasaun ba Parlamentu Nasionál, Governu, parseiru dezvoltamentu, organizaun sosiedade sivil, mídia no sidadaun sira hotu ba sira nia apoiu no konfiansa. Agradesimentu espesial mós ba lideransa no funsionáriu sira ne'ebé servisu ho dedikasaun durante tinan ne'e.

Relatóriu ida-ne'e mós dedika homenagem ba saudoso Paulo Ribeiro, servidór PDHJ ne'ebé hahú servisu iha 2008 no lidera Delegasaun Territoriál Oe-Cusse desde 2016. Nia kontribuisaun, integridade no dedikasaun ba protesau direitus umanus no promosaun justisa sei nafatin sai inspirasaun ba família, kolega servisu no comunidade.

Maske nia isin fila ona ba rai iha 27 Marsu 2025, nia servisu no valor sira permanese moris iha memória instituisaun no sidadaun sira ne'ebé nia serve. Ho respeito no gratidaun, PDHJ rekoñese nia legadu no konvida ita hotu atu kontinua hatutan mehi ba Timor-Leste ida ne'ebé justu, inkluzivu no respeita direitus umanus.

Durante tinan 2025, PDHJ kontinua hala'o servisu sira tuir prioridade estratéjiku lima, mak protesaun, prevensaun, promosaun, supervizaun política públika no dezvoltamentu institusionál kabe ba Planu Estratéjiku 2024–2028.

Iha períodu ida-ne'e, PDHJ prosesa keixa sira, investiga alegasaun violasaun direitos humanos no boa governasaun, monitoriza sela detensaun, prizaun, ospital no instituisaun solidariedade sosial, hala'o atividade edukasaun no sensibilizasaun pública, nomós realiza estudo no fiskalizasaun konstitusionál hodi asegura katak política pública no lejislasaun sira respeita Konstituisaun no prinsipiu direitos humanos.

Iha área institusionál, PDHJ fortalese sistema planeamentu, jestaun rekursu umanu, auditoria interna, jestaun financeira, kooperasaun no parseria.

Maski hasoru limitasaun iha rekursu umanu, orsamentu, infraestrutura no teknolojia informasaun, PDHJ kontinua hala'o nia mandatu ho independénsia, integridade no profesionalizmu hodi garante asesu sidadaun sira ba justisa no protesaun direitos humanos, hanesan turiami:

FUNSIONAMENTU NO DEZENVOLVIMENTU INSTITUSIONÁL

Planeamentu, no Dezenvolvimentu Estratéjiku

Provedoria Direitos Humanos no Justisa (PDHJ) implementa programa rua: **Direitos Humanos e Boa Governação no Funcionamento e Desenvolvimento Institucional**. Programa sira-ne'e relaciona ho servisu protesaun, prevensaun, promosaun no supervizaun política pública, nomos fortesimentu kapacidade institusionál.

Durante tinan ne'e, Konsellu Diretivu realiza enkontru regular hodi monitoriza progresu servisu no define prioridade institusionál. PDHJ mós organiza orientasaun estratéjika ba diresaun no xefia sira atu

harmoniza komprensaun kona-ba prioridade servisu institusionál tuir Planu Estratéjiku 2024–2028.

Halo avaliasaun no monitorizasaun regular. Iha Avaliasaun no Retiru Anuál 2025 identifika progresu importante iha implementasaun mandatu PDHJ durante tinan 2025, nomós deskobre dezafiu sira relasiona ho limitasaun rekursu umanu, orsamentu, infraestrutura no sistema teknolojia informasaun. Kestaun sira-ne’e afeta efisiénsia servisu promosaun, monitorizasaun, investigasaun no jestaun dados.

Tan ne’e, PDHJ rekomenda kontinua investe iha formasaun pesoál, modernizasaun sistema dijitál, hadi’a infraestrutura ICT no reforsa sistema kontrolu interna.

Ba tinan 2026, PDHJ prepara planu no proposta orsamentu atu asegura kontinuidade servisu no implementasaun prioridade estratéjika sira. Hafoin prosesu revizaun orsamentál, alokasaun finál ba PDHJ aprovalu hosi Parlamentu Nasional ida ne’e mak ho montante **US\$ 2,130,198**, ne’ebé sei uza atu sustenta servisu protesau, prevensaun, promosaun no supervizaun direitus umanus no governasaun di’ak nomós funksionamentu institusionál PDHJ nian iha Timor-Leste.

Jestaun Rekursu Umanu no Dezenvolvimentu Kapasidade

Durante tinan 2025, Provedoria Direitus Humanus no Justisa (PDHJ) kontinua fortalese kapasidade institusionál liu-hosi jestaun rekursu umanu ne’ebé bazeia ba prinsípiu méritu, transparénsia no profesionalizmu. Reafirma kompromisu PDHJ atu fortalese governasaun di’ak no aumenta konfiansa públiku ba instituisaun.

Eskalaun / Modalidade Kontratual	Seksu		
	F	M	Seluk
Funسیونáriu Públiku Permanente	43	50	-
Ajente Administraun Públika	11	26	-
Regime a termo certo	5	12	-

Eskalaun / Modalidade Kontratual	Seksu		
	F	M	Seluk
Kazuais	-	-	1
Titulares / Kargu Politiku	1	2	-
TOTAL	60	90	1

To'o tinan 2025 nia rohan, PDHJ iha forsa traballu hamutuk ema 151, kompostu hosi funsionáriu públiku permanente, ajente administrasaun públika, kontratu termu sertu, pesoál kazual no titulares kargu polítiku, ladauk inklui pontu vokal sira iha leten, tanba sira efetiva iha 2026.

PDHJ kolabora ho Comissão da Função Pública (CFP), realiza konkursu interna ba kargu diresaun no xefia (vaga 16).

Aleinde ne'e, PDHJ mós rekruta Ajente Administrasaun Públika (AAP) hamutuk ema na'in 13 hodi sai pontu vogál iha munisípiu sira, hodi aproxima servisu direitus umanus no governasaun di'ak ba comunidade sira iha território nasional.

Durante tinan 2025, PDHJ simu estudante no peskizadór hamutuk ema 48 hosi universidade no sentru formasaun oioin hodi realiza peskiza no estájiu relasiona ho mandate no lala'ok servisu PDHJ nian.

PDHJ promove no fasilita formasaun ba funsionáriu sira kona-ba investigasaun, jestaun keixa, lideransa, komunikasaun organizasionál, ASEAN note taking, elaborasaun relatóriu, direitu ema ho defisiénsia (CRPD), lingua jestuál no área relevante sira seluk ne'ebé iha relasaun ho mandatu institusionál.

Funsionáriu sira mós partisipa iha programa formasaun rejional no internasionál hanesan South East Asian Ombudsman Forum (SEAOFF), International Visitor Leadership Program (IVLP), International Law Enforcement Academy (ILEA) no New Zealand English Language Training for Officials (NZELTO).

Investimentu iha rekursu umanu no kapasitasaun kontinua nu'udar estratejia hodi kontribui ba fortalese profissionalizmu, efisiénsia no implementa mandatu konstitusionál ho efetivu.

Jestaun Finanseira

Orsamentu Jeral Estadu tinan 2025 ba PDHJ alokasaun inisiál hamutuk US\$ 2,139,368 ba programa direitos humanos no governasaun di'ak no Funsionamentu no Dezenvolvimentu Institusionál. Orsamentu ne'e fó prioridade ba fortalese rekursu umanu, suporta atividade operasionál no mobilidade servisu.

Durante prosesu ezekusaun, PDHJ halo ajustamentu no realokasaun orsamental tuir nesesidade institusionál, ho montante hamutuk US\$ 161,235.60 ekivale 8% hosi total dotasaun.

Realokasaun ne'e permite reforsa área prioritária sira hanesan deslokasaun servisu, servisu profissionais, akizisaun ekipamentu informátika no akizisaun veikulu operasionál. Mudansa ida-ne'e mós influensia hosi kanselamentu projetu konstrusaun edifísiu foun PDHJ nain.

Hafoin ne'e, iha fulan ikus tinan 2025 PDHJ simu novidades ida katak, Governu kontinua prosesu ba konstrusaun edifísiu foun PDHJ nian. Nune'e Governu liu hosi ministeriu finansas halo transferénsia adisional hosi Dotasaun *Todo Governo* ho montante US\$ 150,666.66 ekivale 7% hosi total dotasaun inisial, nune'e dotasaun finál tinan 2025 ba PDHJ mak US\$ 2,290,034.66.

To'o tinan 2025 nia rohan, PDHJ konsege ezekuta orsamentu hamutuk US\$ 2,051,878.72, ekivale 90% hosi dotasaun finál. kategoria salários e vencimentos atinje ezekusaun 90%, bens e serviços correntes 87%, transferências públicas 100%, no capital menor 95%.

Iha nível programa, taxa ezekusaun ba programa direitos humanos no governasaun di'ak atinje 94%, enkuantu programa funsionamentu no dezenvolvimentu institusionál atinje 89%.

Despeza prinsipál sira relaciona ho pagamentu ba rekursu umanu, arrendamentu edifísiu, mobilidade operasionál, komunikasaun, eletrisidade, materiál eskritóriu, no akizisaun ekipamentu no veikulu hodi apoia servisu institusionál.

Rezultadu ida-ne'e hatudu katak PDHJ kontinua hametin sistema jestaun interna no garante disponibilidade rekursu nesesáriu sira atu implementa nia mandatu konstitusionál ho efetivu.

Jestaun Patrimóniu, Lojístika no Teknolojia Informasaun

To'o tinan 2025 nia rohan, PDHJ iha patrimóniu operasionál importante sira hanesan kareta 21, motor 12, komputador 165, laptop 53, impressora 31, makina fotokópia 4 no air conditioner 43. Maski maioria patrimóniu sira iha kondisaun di'ak, balu prezisa manutensaun ka substituisaun tanba idade utilizasaun no desgastu operasionál.

Iha área lojístika, PDHJ asegura disponibilidade materiál eskritóriu, materiál konsumível no ekipamentu apoia operasionál sira atu sustenta servisu diária instituisaun.

Aleinde ne'e, PDHJ mós realiza akizisaun ba materiál limpeza no sanitáriu, nomos bens konsumíveis sira hanesan kafe, bee hemu no nesesidade operasionál seluk.

Durante tinan 2025, servisu aprovizionamentu hala'o prosesu tenderizasaun. Prosesu sira-ne'e inklui fomesimentu *catering*, komunikasaun, impressaun, kombustível, materiál eskritóriu, manutensaun eletrisidade no AC, ekipamentu informátika, transportes no arendamentu edifísiu provizóriu PDHJ. Nune'e, total pagamentu ne'ebé realiza liu-hosi prosesu tenderizasaun atinje US\$ 440,091.25 kuaze 19% hosi dotasaun final.

Iha área Teknolojia Informasaun no Komunikasaun (ICT), PDHJ kontinua utiliza sistema internet, plataforma dijitál no ekipamentu informátika hodi apoia komunikasaun, jestaun dados no prestasaun servisu.

Internet fornese hosi DNIC-MTC ho kapasidade 20 Mbps ba edifisiu sentrál no 10 Mbps ba delegasaun territoriais sira. Atu garante seguransa dadas, PDHJ mantén servidor iha edifísiu sentrál no Data Center DNIC-MTC.

Maski nune'e, PDHJ hasoru dezafiu relasiona ho ekipamentu eletróniku ne'ebé balu utiliza ona liu tinan tolu, kapasidade internet limitadu no problema iha sistema armazenamentu dadas. Kondisaun ida-ne'e afeta responsividade servisu ICT no seguransa informasaun institusionál. Tan ne'e, PDHJ identifika nesesidade atu kontinua investe iha renovaun ekipamentu, manutensaun sistema no modernizaun infraestrutura dijitál hodi garante servisu ne'ebé seguru, estável no efisiente liu.

Kooperasaun no Parseria

PDHJ servisu hamutuk ho parseiru nasionál no internasionál sira, inklui embaixada, organizaun dezvoltimentu no rede kolaborativu sira, ne'ebé foka ba inklusaun sosiál, igualdade jéneru, direitu ema ho defisiénsia, dezvoltimentu infraestrutura inkluziva, mediasaun no fortalese kapasidade institusionál.

Liu-hosi enkontru bilateral, troka informasaun no koordena asaun conjunta, PDHJ promove kolaborasaun iha área sistema prizonál, inklusaun sosiál, prevensaun violasaun direitus umanus no fortalese kapasidade institusionál.

Parseria ne'e kontribui ba harmonizaun esforsu entre entidade relevante sira no ajuda garante katak intervensaun sira responde efetivamente ba nesesidade comunidade.

Iha tinan 2025, PDHJ no Komisi Nasionál Hak Asasi Manusia Republik Indonesia (KOMNAS HAM) asina akordu tekniku servisu hamutuk ba períodu tinan rua. Akordu ida-ne'e fó enfase ba formasaun, diálogo komunitáriu, fiskalizaun direitu ekonomia, sosiál no kultura (ECOSOC) iha área fronteira Timor-Leste–Indonézia, nomos dezvoltimentu institusionál atu hasa'e efetividade servisu iha promosaun no protesau direitus umanus.

Aleinde ne'e, PDHJ hamutuk ho Komisaun Anti-Korrupsaun (CAC), Komisaun Funsau Públika (CFP) no Inspesaun Jerál Estadu (IGE), nomos iha Rede Apoiu Servisu Prizionál (RSAP), kontinua promove koordinasaun interinstitusionál, hodi prevene má-jestaun no proteje direitu umanus.

Durante tinan 2025, PDHJ hala'o mós vizita kortezia hodi halo komunikaun estratéjiku ho autoridade lokál sira iha munisipiu sira hodi aborda kestaun governasaun di'ak, profissionalizmu servisu públiku, asesibilidade servisu ba comunidade, seguransa públika, utilizaun rekursu públiku no nesesidade atu hametin asesu sidadaun sira ba mekanizmu keixa no protesaun direitus umanus. Autoridade sira manifesta kompromisu atu kontinua koopera ho PDHJ no implementa rekomendasaun relevante sira.

Liu-hosi parseria no diálogo institusionál hirak ne'e, PDHJ reafirma ninia kompromisu atu hakbesik servisu ba povu, hametin mekanizmu protesaun direitus umanus no promove kultura governasaun di'ak iha nível nasional nomós lokál.

Servisu Inspesaun, Auditoria no Apoiu Juridiku

Durante tinan 2025, Gabinete Inspesaun hala'o servisu rua mak *assurance* no *consulting* atu hametin kontrolu interna, transparénsia no efisiénsia institusionál.

Durante tinan ne'e, Gabinete Inspesaun produz no submete relatóriu servisu hitu ba Provedór, inklui relatóriu assessment ba servisu PDHJ, relatóriu auditoria investigativu no relatóriu Cash Opname ba delegasaun territoriais no finansas nasional. Atividade sira-ne'e ajuda identifika risku operasionál no promove melloria iha sistema jestaun interna.

Iha área apoiu juridiku, PDHJ fornese pareser juridiku hamutuk 158 durante tinan 2025 ba Provedór, Provedór Adjuntu sira, diresaun traballu no entidade seluk. Pareser hirak-ne'e kobre relatóriu temátiku, jestaun finanseira, kontratu, patrimóniu, komunikaun institusionál no asuntu legal seluk. Servisu juridiku mós realiza

divulgasaun lejislasaun ba funsionáriu sentrál no delegasaun territoriais, inklui tema kona-ba mandatu PDHJ, regime uza forsa no aprovizionamentu públiku.

Aleinde ne'e, Unidade Asisténsia Juridika, Administrativa no Peskiza finaliza padraun prosedimentu operasionál ba peskiza no manuál prinsipiu governasaun di'ak, enkuantu manuál jestaun kazu no prosedimentu fiskalizaun no monitorizaun sei iha prosesu diskusaun.

SERVISU PROTESAUN

Durante tinan 2025, PDHJ rejista keixa hamutuk 179, kompostu hosi keixa 175 ne'ebé hatu'o hosi sidadaun sira no keixa 4 ne'ebé rejista bazeia ba iniciativa Provedór.

Hosi keixa hirak ne'e, keixa barak liu mai hosi Munisípiu Dili, no alegasaun ne'ebé identifika barak liu relasiona ho violénsia física, abuzu poder, falta transparénsia no kobransa ilegál iha servisu públiku.

Bazeia ba rezultadu avaliasaun preliminaríu, keixa 101 loke ba investigasaun, keixa 22 loke ba investigasaun no haruka notisia krime ba Ministériu Públiku, keixa 13 rezolve liu-hosi mediasaun no konsiliaun, keixa 12 refere ba entidade relevante no monitoriza nafatin, keixa 15 taka no haruka ba entidade competente, keixa 15 taka arkiva, no keixa ida mak adia desizaun tanba presiza análise adisionál.

Iha área mediasaun no konsiliaun, hosi kazu 13 ne'ebé Komite Jestaun Keixa decide atu rezolve liu-hosi mekanizmu ne'e, kazu 11 konsege rezolve ona no hetan akordu entre parte sira, kazu ida tama iha fase pre-mediasaun no kazu ida seidauk prosesa.

Durante tinan 2025, PDHJ prosesa kazu investigasaun hamutuk 217, kompostu hosi 128 kazu governasaun di'ak no 89 kazu direitus umanus, ne'e inklui kazu sira ne'ebé kontinua hosi tinan 2024.

Hosi kazu hirak ne'e, kazu 194 konsege konklui ona, kompostu hosi kazu governasaun di'ak 112 no kazu direitos umanus 82, enkuantu kazu 23 sei kontinua nia prosesu iha tinan 2026.

Hosi kazu 194 ne'ebé konklui ona, 134 kazu (69%) arkiva tanba laiha evidénsia suficiente ka problema rezolve ona, 23 kazu (12%) termina ho relatóriu investigasaun no sujestaun, no 37 kazu (19%) termina ho relatóriu investigasaun no rekomendasaun tanba komfirma iha violasaun ba direitos umanus ka prinsipiu governasaun di'ak.

Violasaun governasaun di'ak barak liu relasiona ho administrasaun ladi'ak (38%), abuzu poder (36%) no ilegalidade (22%), enkuantu violasaun direitos umanus maioria relasiona ho direitu ba liberdade, integridade no seguransa ema nian.

Iha área monitorizasaun rekomendasaun, PDHJ haree tuir implementasaun Relatóriu Investigasaun Final (RIF) ho rekomendasaun 26, kompostu hosi direitos umanus 16 no governasaun di'ak 10. Hosi rekomendasaun direitos umanus 100% implementa ona hosi entidade respondente sira. Enkuantu hosi rekomendasaun governasaun di'ak 10, 7 implementa ona no 3 implementa parsialmente.

SERVISU PREVENSAUN

Durante tinan 2025, Provedoria Direitos Humanos no Justisa (PDHJ) kontinua hala'o servisu prevensaun liu-hosi fiskalizasaun regular no monitorizasaun urjente hodi prevene violasaun direitos umanus no promove governasaun di'ak. Servisu ida-ne'e foka ba fatin privasaun liberdade, sistema saúde no instituisaun solidariedade sosiál, atu asegura katak prestasaun servisu públiku no tratamentu ba sidaun sira respeita dignidade umana no direitu fundamentál.

Iha área privasaun liberdade, PDHJ hala'o monitorizasaun regular ba sela detensaun no prizaun sira hodi avalia kondisaun moris ekluzu sira nian, asesu ba alimentasaun, bee-moos, servisu saúde, facilidade sanitáriu no tratamentu hosi autoridade relevante sira.

Fiskalizaun sira-ne'e identifika dezafiu relasiona ho kapasidade fatin detensaun ne'ebé limitadu, nesesidade manutensaun infraestrutur no importánsia atu garante katak ema ne'ebé lakon liberdade nafatin hetan protesau direitu fundamentál tuir Konstituisaun no padraun internasionál. Bazeia ba rezultadu monitorizasaun, PDHJ hato'o rekomendasaun ba entidade kompetente sira hodi hadi'a kondisaun no prevene tratamentu ne'ebé bele viola dignidade umana.

Aleinde monitorizasaun regular, PDHJ mós hala'o **fiskalizaun urjente** ba objetu oioin ne'ebé iha indikasaun violasaun direitus manus no preokupasaun públika, inklui konfliktu rai no propriedade, alegasaun violénsia no uza forsa liu medida hosi autoridade seguransa, situasaun sidadaun vulnerável sira, nomos akontesimentu seluk ne'ebé prezisa intervensaun imediata.

Mekanismu ida-ne'e permite PDHJ responde ho lalais, halo observaun direta, halibur informasaun hosi vítima, testemuña no entidade relevante sira, no hato'o rekomendasaun ba autoridade kompetente atu foti medida adekuada hodi prevene agravamentu situasaun no garante protesau ba sidadaun sira nia direitu.

Iha setór saúde, PDHJ monitoriza **estabelesimentu saúde 34** iha munisípiu 14 inklui RAEOA. Rezultadu hatudu, sistema saúde kontinua enfrenta dezafiu relasiona ho disponibilidade medikamentu, kondisaun fasilidade no ekipamentu ne'ebé seidak adekuadu, nomos distribuisaun rekursu umanu ne'ebé la ekilibradu, liu-liu iha área remota.

PDHJ mós hala'o monitorizasaun ba **Instituisaun Solidariedade Sosiál 11**. Rezultadu monitorizasaun hatudu katak maioria instituisaun sira iha fasilidade bázika, maibé kontinua hasoru limitasaun iha infraestrutur, ekipamentu no fasilidade suporta sira, ne'ebé afeta kualidade atendimentu no bem-estar benefisiáriu sira nian.

Liu-hosi servisu prevensaun hirak ne'e, PDHJ kontinua dezempeña nia papel hanesan mekanizmu independente atu identifika risku

violasaun direitus umanus, promove responsabilidade institusionál no kontribui ba hadi'ak kualidade servisu públiku. Rekomendasaun sira ne'ebé hato'o ba entidade relevante sira espera bele haforsa sistema prizaun, saúde no protesau n soslál ne'ebé efetu, inklui kria politika publika ida ne'ebé proteje dignidade humana no respeita direitus sidadaun sira nian iha Timor-Leste.

SERVISU PROMOSAUN

Durante tinan 2025, PDHJ kontinua implementa servisu promosaun hanesan estratéjia importante atu hasa'e konsiénsia públika kona-ba direitus umanus no governasaun di'ak.

Edukasaun no Formasaun

Liu hosi parseria ho ONU Direitus Umanus iha Timor-Leste, UNDP, MAE, Ministériu Interior, SECOOP no organizasaun sosiedade sivil sira, PDHJ organiza atividade formasaun ba grupu alvu oioin iha territóriu nasional.

Ba membru PNTL 97, membru F-FDTL 96, guarda prizonál envolve partisipante hamutuk ema 128.

Ba servidór públiku sira, PDHJ hamutuk ho UNDP fasilita formasaun governasaun di'ak ba funsionáriu públiku hosi ministériu oioin hamutuk ema 167, no ba funsionáriu no autoridade lokál iha munisípiu sira hamutuk ema 218. Servisu hamutuk ho MAE permite realiza formasaun ba autoridade komunitária hamutuk ema 250.

Aleinde ne'e, PDHJ fasilita formasaun ba Parlamentu Foinsa'e Nian hamutuk ema 25, juventude no autoridade komunitária hamutuk ema 329, no atividade sensibilizasaun kona-ba estigma no diskriminasaun ba comunidade no profesionál saúde sira hamutuk ema 433.

PDHJ mós organiza formasaun ba formador sira hosi PDHJ, CAC, CFP no IGE hamutuk ema 27 hodi utiliza manuaál governasaun di'ak no direitus umanus foun.

Diseminasau n Informasaun

Para-lein-de formasaun, PDHJ liu hosi servisu promosaun iha nível nasionál no delegasaun territorial sira, continua hala'o atividade diseminaun informasaun ba comunidade, estudante, universitáriu, grupu vulnerável no grupu minoritáriu sira hodi hasa'e konsiênsia públika kona-ba direitos umanus, governasaun di'ak, prosesu hatu'o keixa, tráfico umanu no prevensaun violênsia bazeia ba jêneru.

Atividade sira-ne'e konsege envolve ema hamutuk **2,310**, kompostu hosi comunidade, estudante, universitáriu, grupu vulnerável no grupu minoritáriu, ne'ebé maioria partisipante feto.

Aleinde diseminaun kona-ba direitos umanus no governasaun di'ak, PDHJ mós fó atensaun espasu dijitál. Iha 2025, PDHJ partisipa iha atividade literasia dijitál hodi fahe kona-ba benefísiu no risku utilizaun média sosiál no Intelijênsia Artificiál (AI) iha Maliana, Covalima, Liquiça no Dili ne'ebé envolve ema besik 300.

PDHJ mós partisipa iha eventu nasionál no rejionál kona-ba protesauun direitos umanus iha espasu dijitál, inklui Fórum ASEAN–UNESCO iha Bangkok no Konferênsia SEANF iha Jakarta, hodi promove asesu dijitál ne'ebé seguru, inkluzivu no respeita sidadaun sira nia direitu fundamental.

Partisipasaun iha Eventu Nasional no Internacional

Nu'udar parte hosi servisu promosaun, durante tinan 2025 PDHJ partisipa ativamente iha eventu no fórum nasionál oioin hodi promove direitos umanus, governasaun di'ak no responsabilidade sosiál. Ne'ebé, PDHJ hatu'o perspetiva kona-ba importante protesauun direitu labarik, seguransa ai-han no nutrisaun, liberdade akademika, igualdade no inkluzividade iha ambiente edukasionál, nomos nesesidade atu hametin responsabilidade instituisaun públika no sociedade tomak ba respeito direitos umanus.

PDHJ enkoraja parseria entre governu, parseiru dezentvolvimentu no sociedade sivil hodi responde ba dezafiu sira ne'ebé afeta grupu vulnerável, liu-liu labarik no juventude.

Promove estudante no comunidade sira nia konsiênsia kona-ba liberdade akademika, integridade, responsabilidade sosiál no partisipasaun ativa iha dezvoltamentu nasaun.

Alein-de partisipasaun iha eventu nasional sira, durante tinan 2025 PDHJ mós partisipa ativamente iha eventu no fórum internasionál oioin inklui enkontru rede Instituisaun Nasionál Direitus Umanus (NHRI), fórum ASEAN no eventu internasionál sira ne'ebé aborda tema hanesan protesasaun direitus umanus, demokrasi, governasaun di'ak, inkluzsaun dijitál no dezvoltamentu sustentável.

Liu hosi atividade hirak ne'e, PDHJ aumenta asesu ba koñesimentu, pratika di'ak no parseria estratéjika ne'ebé bele kontribui ba hadi'ak implementasaun mandatu PDHJ nia iha Timor-Leste.

Iha fórum internasionál sira-ne'e, nu'udar mós oportunidade ba PDHJ hodi hato'o perspetiva Timor-Leste nian kona-ba demokrasia, direitus umanus no governasaun di'ak.

Partisipasaun iha diálogu no konferênsia internasionál sira reafirma kompromisu PDHJ atu promove valór demokrátiku, proteje direitus umanus no responde ba dezafiu foun sira, inklui utilizausaun espasu dijitál no teknolojia.

Aleinde ne'e, rezultadu hosi fórum sira-ne'e kontribui ba fortalese kooperasaun rejionál no internasionál, no apoia esforsu Timor-Leste atu hametin instituisaun demokrátika no protesasaun direitus umanus iha nível nasional.

Selebrasaun Eventu Nasional no Internasional

Iha tinan 2025 PDHJ celebra aniversáriu ba dala 21 ho tema **“Lian ba Lian Laek Sira”**, ne'ebé reflete kompromisu institusional atu sai lian ba sidadaun vulnerável sira no sira ne'ebé hasoru difikuldade atu asesu ba justisa. Iha selebrasaun ne'e, PDHJ reafirma nia papel hanesan Instituisaun Nasionál Direitus Umanus independente no lansa Relatóriu Anuál 2024, Relatóriu Finanseira 2024, relatóriu fiskalizausaun ba sela detensaun, prizaun, sentru protesasaun sosiál, postu saúde, sentru saúde no ospital sira, nomos Relatóriu

Investigasaun Finál. Eventu ne'e envolve mós instituisaun respondente, órgaun justisa, PNTL, F-FDTL, CAC no parseiru relevante sira.

Hamutuk ho ONU Direitus Umanus iha Timor-Leste celebra **Loron Mundiál Direitus Umanus ba dala 77** iha Suku Hera, Dili, ho tema **“Human Rights: Our Everyday Essentials”**, durante loron rua. Atividade sira inklui kuda ai-oan, kompetisaun pintura no diskursu ba estudante sira, jogu amizade ho comunidade, diálogu komunitáriu no lansamentu relatóriu investigasaun.

Iha diálogu ne'e comunidade sira hato'o preokupasaun kona-ba disputa rai, violénsia doméstika, infraestrutura no saúde.

Media no Informasaun

Nu'udar parte hosi servisu promosaun, durante tinan 2025 Provedoria Direitus Humanus no Justisa (PDHJ) continua fortalece komunikaun institusionál liu hosi website, mídia sosiál no meius komunikaun seluk hodi asegura asesu públiku ba informasaun kona-ba direitus umanus no governasaun di'ak. To'o rohan tinan, PDHJ publika **103 artigu iha website**, halo **324 publikasaun iha Facebook**, hetan **2.004 seguidor foun**, no rejista **160.389 interasaun (engagement)**, ho aumentu 121% kompara ho tinan kotuk. Vídeu sira ne'ebé produz no distribui hetan **111.479 visualizasaun**, enkuantu website PDHJ hetan tráfikku aas hosi vizita direta no peskiza orgánika, ho utilizadór barak liu mai hosi Timor-Leste, Estadus Unidus, Xina, Indonézia no Austrália. Aleinde ne'e, Unidade Mídia PDHJ lidera reativasasaun Grupu Traballu Komunikaun Estratéjiku SEANF, ne'ebé fortalece kooperasaun no komunikaun entre Instituisaun Nasionál Direitus Umanus iha Sudeste Aziátiku. Liu hosi entrevista, podcast, talkshow no mensajen institusionál, PDHJ continua kontribui ba konsolidasaun kultura demokrátika, promove edukasaun sivika no aumenta asesibilidade públika ba informasaun no rekomendasaun institusionál.

SERVISU SUPERVIZAUN POLÍTICA PÚBLIKA

Iha tinan 2025, PDHJ kontinua halo esforsu sira hodi asegura katak formulasaun no implementasaun política pública sira harmoniza ho prinsipíu governasaun di'ak no respeita direitus umanus. Atividade hirak ne'e inklui revizaun instrumentu estratéjiku, avaliasaun política pública, peskiza no estudu temátiku, nomós kontrolu konstitusionáldade ba lei no regulamentu sira.

Iha kuadru parseria ho Programa Nasoins Unidas ba Dezenvolvimentu (PNUD), Office of the High Commissioner for Human Rights (OHCHR) no Global Alliance of National Human Rights Institutions (GANHRI), PDHJ halo revizaun ba Manuál Formasaun Governasaun Di'ak no Direitus Umanus ba servidór públiku, no kontinua avalia impaktu implementasaun tinan lima dahuluk Planu Asaun Nasionál ba Ema ho Defisiénsia (PAN-EhD) períodu 2021–2030.

Iha tinan 2025 mós, PDHJ realiza avaliasaun impaktu apoiu finanseiru hosi Ministériu Solidariedade Sosiál no Inklusaun (MSSI) ba organizesaun sira ne'ebé presta servisu ba ema ho defisiénsia, kontinua halo levantamentu kona-ba implementasaun prinsipíu governasaun di'ak iha instituisaun pública setór sosiál, no hala'o estudu kona-ba qualidade atendimentu públiku iha Diresaun Nasionál Rejistu no Notariadu relasiona ho emisaun Billete Identidade (BI) no pasaporte.

Rezultadu estudu hatudu katak, maske servisu refere hatudu progresu iha aspetu disponibilidade no atendimentu, sei iha limitasaun sira relasiona ho infraestrutura, sistema informática no asesibilidade ba grupu vulnerável sira.

Iha área kontrolu konstitusionáldade, entre 2023–2025, PDHJ submete petisaun fiskalizasaun abstrata ba Tribunál Rekursu relasiona ho lei no regulamentu balu, inklui:

- 1) Lei n.º 7/2025 kona-ba revogasaun pensaun vitalisia ba eis-titular órgaun soberania,

- 2) Diploma Ministerial n.º 17/2025 kona-ba konkursu admisaun Ajente PNTL,
- 3) Dekretu-Lei n.º 86/2022 kona-ba carreira profisionál saúde,
- 4) Lei n.º 20/2023 kona-ba indultu no komutasaun pena,
- 5) Artigu 1475 Kódigu Sivil,
- 6) Dekretu-Lei n.º 21/2021 kona-ba subsídiu transporte,
- 7) Dekretu-Lei n.º 32/2011 kona-ba jestaun bens móveis Estadu,
- 8) Política Nasionál Planeamentu Familiar,
- 9) Artigu 128 hosi Estatutu Profisionál PNTL.

Hosi petisaun hirak ne'e, Tribunál Rekursu deklara inkonstitusionáldade parcial ba Lei n.º 7/2025, Diploma Ministerial n.º 17/2025 no Dekretu-Lei n.º 86/2022.

PDHJ mós submete petisaun verifikasaun inkonstitusionáldade tanba omisaun medida lejizlativa relaciona ho:

- 1) Falta Lei Justisa Juvenil,
- 2) Lei responsabilidade Estadu no indemnizasaun,
- 3) Lei kona-ba kondisaun traballu doméstiku,
- 4) Lei kona-ba terras komunitárias,
- 5) Lei protesaun dados pessoais, no
- 6) Lei rejistu sivil.

Hosi petisaun hirak ne'e, Tribunál Rekursu deklara inkonstitusionáldade tanba omisaun ba inexisténsia lei protesaun dados pessoais no orienta Parlamentu Nasionál atu prepara diploma legal relevante.

Liu hosi atividade hirak ne'e, PDHJ reafirma ninia papel nu'udar instituisaun independente ne'ebé iha mandatu konstitusionál atu

monitoriza política pública, promove governasaun di'ak no garante katak lei no medida estadu sira harmoniza ho Konstituisaun no proteje direitu, liberdade no garantia fundamentál sidadaun sira.

MAKTAKAN

Provedoria Direitus Humanus no Justisa (PDHJ) kontinua ezerse ninia mandatu ho independénsia, integridade no profesionalizmu liuhosi tratamentu keixa, monitorizasaun, investigasaun, promosaun, peskiza no supervizaun política pública iha territóriu nasional, rai doben Timor Loro Sa'e.

Maske enfrenta dezafiu relasiona ho rekursu umanus, infraestrutura no kapasidade institusionál, rezultadu sira ne'ebé alkansa refleto dedikasaun lideransa no funsionáriu PDHJ, nomós kooperasaun ho orgaun soberania, parseiru dezvoltamentu, sociedade sivil, média no comunidade sira.

Ho esperansa no determinasaun, PDHJ serbisu hamutuk ho kamada hotu-hotu hodi kontinua hametin Estadu de Direitu Demokrátiku no servisu ba defende dignidade umana, promove governasaun di'ak no asegura katak direitus umanus no liberdade fundamentál sidadaun sira hotu respeitadu no protejidu.



Virgílio da Silva Guterres “Lamukan”
Provedór Direitus Humanus no Justisa